

《感事錄》

〈哀難民〉

烏雲壓原野，蒼茫晝如昏。風沙來四面，有客扣我門。媪嫗無完裙，懷中抱幼孫。乳兒瘦欲折，老婦淚未乾。入門且求宿，嗚咽更訴冤。曾是葛天民，塵埃絕桃源。倏忽起貪狼，風捲烏克蘭。我夫陣前死，我屋化斷垣。膝下惟二子，入伍守津關。槍聲夾炮火，煙塵滿乾坤。曾經逸樂地，剎那成鬼村。大兒無音訊，么兒屍骨寒。哀哀孫兒母，攜掠成慰安。烽火動經年，凶敗與傷殘。一家十餘口，僅我二人存。前路險且阻，動輒摧心肝。何時洗兵馬，悵望向鄉園。語罷更嗚咽，我亦慟難言。六界千萬里，憑誰救元元。

〈美國關稅〉

花旗飄動日，曾是五風和。待物如芻狗，徵租及企鵝。弘羊今不在，碩鼠一何多。雨若愁關稅，休經聖保羅。

〈股災〉

貨稅衝天起，盤中誰領銜？崩騰熊入市，震盪勢非凡。面板無紅線，神山滿綠杉。公園相約日，護國有龍巖。

〈韭〉

盡日風兼雨，相仍不可逃。六親生赤土，一世著青袍。蹇分偏安命，微身敢告勞？焉知留根處，歲歲受鎌刀。

〈南韓戒嚴〉

黑鷹來夜半，煙火忽相兼。詔令由天闕，豺狼入殿簷。民權皆迴奪，牙爪也平添。何必飄搖故，時安亦戒嚴。

〈緬甸地震〉

寰中苦諦多難盡，地勢何因走蝮蛇？住相剎那成泡影，娑婆劫燼等恒沙。張狂世界千山動，顛倒風雷八柱斜。緬甸離披人散亂，生無消息死無家。

〈夢少陵〉

寂寞復寂寞，堂前蕭蕭長風動。吟罷三吏及三別，夜半少陵忽入夢。問我可曾洗甲兵，千萬廣廈與民共。經也在高閣，書也覆瓦甕。君詩雖沉鬱，現世久矣不復誦。短影片，滿巷弄。抖音騰訊與微博，指間干戈是獨統。士大夫，發吟諷。民代縱知秋風歌，天下寒士猶饑凍。堯已年湮舜世遠，人間空有河清頌。相對各默默，一思一悲慟。千古傷心語，書生無一用。

〈麻雀悲〉

連日來風雪，塵間舉翅艱。麻雀為驚起，紛飛體欠安。鷓鴣知此事，殷勤為探看。介紹鳴鴉府，門前一壺懸。莫嫌面容惡，精通本草編。入門忽眩暈，不意躓而顛。一瞬天地翻，手足俱攣牽。鷓鴣與鳴鴉，分立各一端。「向來無恩仇，何事苦相殘？」「汝也雖卑賤，五臟一應全。十萬換眼膜，百萬買心肝。肺腑如摘盡，能活九參官。房中添美妾，郊外置新田。莫怨吾心狠，怪爾無名權。」可憐此微物，生死剎那間。術後餘空殼，拋卻野道邊。器官皆有價，爾命不值錢。

〈私房暗影〉

勾芒若稷契，嬌養滿庭芳。碎髮珍珠露，柳眉新時妝。懷羞半掩面，含苞也自香。無端遭辣手，折入美圖坊。颯風更為虐，一味逞剛強。或貪玉蕊馥，凌亂芙蓉床。或愛胭脂雨，恣意摧海棠。多少嬌花影，暗積在私房。欺凌無寒暑，會員遍八方。亦有為人父，兒女滿迴廊。亦有為人師，口誦道德章。亦有軍與警，威武著正裝。一朝入暗室，均是能語狼。

〈鬼訴冤〉

黑風掠地陰氣浮，月冷霧濃風動竹。城隍廟前聞擊鼓，鷓鴣鳴時兼夜鬼哭。高門肅肅自排衙，案前晃晃長明燭。提來原告堂前跪，散髮裂唇血滿目。狀告長官何不仁，六時操勞只薄祿。叫呼無異驅豬狗，薪俸回捐更斂剝。城隍聞此語，拍罷驚堂木：「何事苦驚乍？」退堂一何速。冤魂嗷嗷哭不公，小鬼低聲欲勸服：「君不見，城隍目下有臉鬚，判官卷宗滿案牘。阿旁本是真牛馬，我亦勞勞頭欲禿。一身瘦如柴，饑羸僅恃粥。陽世有週末，陰間無休沐。萬一見差池，動輒傷皮肉。勸君莫告人上人，怪爾巖廊無親族。」

〈哀榮嘆〉

萬朵蓮花五色幡，朱門長風動素幔。僧道列兩班，日夜誦經贊。絞紵錦供梁肉，酒醴雞豚滿玉案。馬頭羅刹持鎚來，但見主人涕泣苦招喚。「爾子爾孫實孝誠」，亡靈唏噓只長嘆：「兒女雖才俊，各自躋華貫。哀哉絕天倫，東西隔海岸。獨居三十年，終日倚門盼。生時未曾知肉味，夏無涼風冬無炭。一朝臥病性命危，床前爭產更撩亂。噫吁嚱！堂前哀哀號泣者，輕易莫作孝子看。」

〈客中〉

目極南雲望不窮，人間到處看飛鴻。經綸空有名山在，事業應憐逝水同。草色多情行路外，花魂無主晚風中。憑誰收拾青衫淚，化作殘陽萬里紅。

〈客夜〉

一片寒窗月，更深竹影斜。新詩空費紙，楚客出無車。聚散勞生事，榮枯過眼花。褐衣猶未改，不敢問桑麻。

〈秋行〉

最是人間有不平，煙塵萬里復行行。枝辭落葉曾經綠，月在他鄉分外明。無限新寒催病骨，三更殘夢聽秋聲。年來趨走成何事？又見西風白髮生。

〈即景〉

凌霄峻嶺生孤嶼，獨立蓬萊望八垠。海上魚龍安可數，空中鴛鴦各成群。藍天有意俛紅日，綠樹無端蔽白雲。萬里長風來不定，人間落葉又紛紛。